

Finamira cuminaivla en egl e betg quella dal singul

Parallelas da la politica ed il sport en il pled d'avertura

■ **(anr/fa) Per chattar soluziuns acceptadas da tuts dovri tenor il president dal cussegl grond Martin Aebli la prontadad da collavurar. Mintgatant va quai tenor el mo sch'ins saja pront da desister da l'agen success.** Tge è la differenza tranter in bun ed in fitg bun giugader da hockey, aveva dumandà in schurnalist a Wayne Gretzky, in dals megliers giugaders da quel sport sin tut il mund. *Martin Aebli*, il nov president dal parlament grischun, ha cità en ses pled d'avertura la risposta da Gretzky: «In bun giugader da hockey gioga là nua ch'il puck è. In fitg bun giugader gioga là nua ch'il puck vegn ad esser.» Quest'abilitad dad esser là nua ch'il puck vegn ad esser n'ha da far betg mo cun talent. I saja la summa da talent, diligenza, perseveranza e cundiziun che caracteriseschia in giugader, ha ditg Aebli, «e davosvart dovri però er in'equipa ed in trenader che permettàn da realisar cun success il giu planisà.»

Ina strategia e finamira cuminaivla er en la politica

Il president dal parlament grischun ha menziunà las parallelas dal sport e da la politica: «Per avair success dovri era tar nossa lavur ina finamira cuminaivla che nus vulain cuntanscher tuts ensemen», ha el ditg e constatà ch'i daventia gia da l'entschatta ennà difficil da chattar quella: «Il cumenzament d'in project cuminaivel vegn per regla mess en dumonda gia d'emprim ennà da singuls giugaders da l'equipa, i vegnan adina tshertgads problems e mai soluziuns», ha deplorà Aebli e ditg che la consequenza da quai saja

ch'ins perdia la finamira cuminaivla pli e pli or dals eglis, «uschia crescha la malsegirezza en l'equipa, alura daventi difficil d'avair success per pudair realisar er mo per part la strategia fixada da quel temp e per pudair er anc gudagnar il giu.»

«Personalitads che sorprendan responsabladad»

Tant en la politica sco er en il sport han tenor Aebli las equipas cun success adina fermas personalitads en lur retschas: «Lur caratteristica è quella ch'ellas restan adi-

na fidaivlas a la strategia, er sch'i vegn dir, sche l'adversari gioga sin l'um e l'arbitr tshivla forsà cunter l'atgna equipa.» Personalitads, u per restar tar la parallela cun il sport, giugaders impurtants, sorprendan, sco ch'el ha ditg, responsabladad senza vulair brigliar nunnecessariamain. Il president dal cussegl grond ha tratg pliras conclusiuns da sia cumparegliazion cun il sport: «Per avair success en la politica dovri ina clera finamira ed ina bun'equipa che vul cuntanscher questa finamira», ha manegjà Aebli, «ed i dovra

personalitads a la testa che han il curaschi da realisar cuminaivlamain cun l'equipa las strategias planisadas e concludidas.» I saja er impurtant per parlamentarists da sa dumandar adina sche lur agir correspundia er a la realisaziun da la finamira cuminaivla «u vegn l'agen interess mess en il center?» Il president dal parlament grischun ha avri la sessiun d'october cun il giavisch che sias commembras e ses commembers possian lavurar «a favur da las finamiras e che nus funcziunian er sco equipa».



Martin Aebli tar ses pled d'avertura en il cussegl grond.